

續修潞城縣志序

邑之有志猶國之有史也史兼褒貶
善惡畢記志則獨取其美者而詳誌
之凡夫土地人民政事忠孝節義下
逮飛走動植罔不撫拾而著之書此
非徒侈陳一邑之盛云爾也將使官

斯土者讀而思之而愛養搏節之政
即於是乎起其所係不綦重哉潞城
在晉南下邑也附以平順亦僻壤也
潞志修於康熙丙戌平順志修於康
熙癸酉皆百數十年矣念此百餘年
中其名著甲科聲蜚閭苑者有人其

詳莫之能知矣節凜風霜義薄雲天
者有人其事莫之能道矣推之邑有
良吏經濟在乎人心邑有名賢文章
光諸學校皆我

朝作育之化漸摩而成不為之登諸邑
乘將湮沒而不傳矣當官者烏得而

辭其咎贊皇 崔公宰斯邑承

爵撫曾公飭廣集多士搜求採訪鄉
甯楊君秋湄良史才也屬以筆削之
任事未竣而去官余癸未承乏於茲

甫下車即詢邑志而稿猶未成越明
年初夏 秋湄之稿至披覽之餘其

體裁稍與舊志異而考核精詳文筆
簡括允足稱一家言爰同廣文 溫
君並邑之博學而文者釐定次序校
正誤謬以平順志附於其中緣平順
裁縣後學籍隸潞城也茲將付剞劂
請序於予予謂志者誌山川誌城郭

誌壇廟統村市風土人物胥賴乎志
之成因為之說曰是書也始其事者
崔公之志也終其事而迄於成者予
及同寅諸紳士之志也願後之服官
斯地者覩林總之民生曰吾思所以
撫字之察繁昌之物類曰吾思所以

栽培之因文以見道順俗以敷治同志者諒皆有感於斯志也是為序

光緒十年歲次甲申十二月

誥授奉政大夫同知銜咸豐辛亥科舉人

知潞城縣事上村氏程達天撰

平順志附入潞城小序

事必有徵而始信理以相得而益彰前此潞城
平順各自為志自

國朝乾隆二十九年裁汰平順縣於是平順之學
始附潞城而有鄉學之名歲科兩試凡平順所
屬地面胥赴潞城應童子試榜發則另標曰平

順鄉學其繫之以平順者從其初也其別之以
鄉者統於縣也平順之建始於故明嘉靖七年
當時青羊山巨寇陳卿始就勦捕都給事夏言
建議置縣並置守備等官以防餘孽復萌縣城
當青羊山之要衝地則南割壺關王曲等十里
北割黎城新安等五里其東西一帶青羊等十

六里皆潞城故物也縣裁後丁糧戶口割自壺
者仍歸壺割自黎者仍歸黎割自潞者仍歸潞
至學之專隸潞城舊志無明文大抵以建學之
地舊屬潞城耳夫脩志本學校之責平順之學
既附潞城平順之志不附於潞而焉附乎是以
此次之脩詳斟妥酌兩志合而為一平順縣未

裁以前其事蹟仍依平順舊志書之既見不忍
沒其始之意既裁以後則直附潞城志中以昭
一視同仁之化在平順與潞城試同官考同棚
志合於一而非等易妨假許之舉在潞城與平
順壤相錯人相屬志合於一而並無此疆彼界
之嫌事有固然理有固然則斯志之合亦有不

得不然者謏陋如余何敢執筆序志第分涇別

渭辨淄知澠本末終始豈容混淆用弁數言於

簡以志合修之緣起焉若夫薰香摘豔搜兩學

之人文刻翠裁紅繪五都之風土鼠管花飛山

川生色鸞箋墨舞篇什增輝則余謝不敏云時

光緒甲申孟冬候選州判丁酉科拔貢靜甫氏

劉體中謹序

續修潞城縣志後叙

省罷州縣之有志昉於漢之罷國志
所以繪疆域之廣狹紀風俗之異同
覘人文之盛衰稽物產之贏絀以及
年歲豐歉山川形勢驛站沿革學校
廢興城塹高卑深淺倉庫多寡鹽麩

與夫先達前哲之高蹤奇人傑士之
勝迹隱逸流寓之遺趾名宦鄉賢之
芳徽下逮孝子貞女義夫節婦莫不
備載以供輶軒之採蓋與國史相表
裏也廼或者謂史主勸善懲惡志則
微顯闡幽故善惡備詳諸史志多紀

善而不紀惡一似體例有難同者然
讀志而見紀者之榮惡者亦將化為
善是揚清而激濁之道在其中亦彰
善而殫惡之權行其間殊途何嘗不
同歸乎潞志自康熙四十五年閩中
張公重脩後距今百七十餘年矣其

問天時人事士習民風幾經變更稽
考殊難況潞土瘠民貧無累世簪纓
之族無名山紀載之言無宿儒修士
之遺書無巨室大家之家乘欲從百
年以後攬撫百年以前之事存什一
於千百不幾等於杞宋之無徵乎光